

Lungzswng:

Minzcuz Soujgungh Haeuj Hagdangz

龙胜：民族手工进课堂

Daj 1995 nienz hwnj, Lungzswng Gak Cuz Swciyen Swsuij Yangh Swsuij Siujyoz couh dawz soujgungh dajsiuq, daemjbaengz daengj gij dinfwngz minzcuz conzdungj neix yinxhaeuj gwnzdangz. 17 bi daeuj, gyoengq hagseng youq gwnzdangz daegbied neix, mboujdanh hag ndaej gohyoz vwnzva cihsiz, youh ndaej dawz gij minzcuz vwnzva daegsaek Lungzswng gagmiz neix youq ciepswnj ndawde fazcanj ndaej ngoenz beij ngoenz hunggvangq. Doiq hagseng suciz gyauyuz hix miz ik lailai.

(Se Lunzgan Lungz Cwng)



▲ Youq gwnzdangz hag dinfwngz, hagseng cingq nyinhcaen dingq lauxsae gangj banjdaez nyib buh Hungzyauz.



▲ Gyoengq hagseng youq gwnz dangz soujgungh hag dinfwngz.

Duh'anh:Aen Cezmuz 《Diuq Fouxhanz Hoh Fungsou》 Youq Fuzsan Okmingz

都安：“非遗”节目《丰收扁担舞》享誉佛山

Mboengqgonq, “2012 Fuzsan Ciet Angqyangz Seizcou” hozdung youq Gvangjdungh Fuzsan Si gawjhengz. Gih raeuz Duh'anh Yauzcuz Swciyen Ginzyen Yisuzdonz yienj aen cezmuz 《Diuq Fouxhanz Hoh Fungsou》neix cungfaen baijyienj le minzcuz daegsaek aen yienh Duh'anh, ndaej daengz gyoengq bounxgonz haenh ndei. Aen cezmuz neix hix youq Fuzsan okmingz lo.

《Diuq Fouxhanz Hoh Fungsou》gaenq ndaej lied haeuj Gvangjsih “feihvucziz vwnzva yizcanj”, Ginzyen Yisuzdonz youq gwnz hozdung hung yienj ndaej ndei yawj raixcaix, gyoengqde roq diuzhanz, cezcou yaep vaiq yaep menh, bienqvaq lai cung lai yiengh, baijyienj mwh guh hong caeuq aeundaiej fungsou gij cingzgingj angqyangz vaiqvued haenx. Yienj aen cezmuz 《Diuq Fouxhanz Hoh Fungsou》, doiq doidoengh hong vwnzyi deihfueng minzcuz miz cozyung gig daih.

(Veiz Lieng)



Hocouh: Funghgingj Gyaendei Caeuq Minzcuz Fungcingz Yaek Youq Cunghyangh Densidaiz “Lohnaj”

贺州：优美风景和民俗风情将在央视亮相

12 nyied 24 hauh daengz 29 hauh, Cunghyangh Densidaiz daihcaet dauq cezmuz 《Swngghoz 567》lanzmuz ingjsiengq cuj daeuj daengz Hocouj Si, ingj aen cezmuz yaek baijyienj funghgingj gyaendei caeuq minzcuz fungcingz Hocouh ndeu, aen cezmuz neix cawjdaez dwg “Cunz Lajmbanj Gyaendei Cungguk—Byaij Haeuj Hocouh”. Gyoengq boun ingjsiengq bae Byaguhbozsan, Raemx Cibbet, Rinnyawhdumj, Cingeq Vangzyauz, Fuconh Siusuij Mbanj Cangyenz, Ranzhumx Gwzgyah doengh gij dieg neix, ingjsiengq caijfangj fouxhaizbenj Yauzcuz, fouxfaexsax, dieb bakcax caij gyoqfeiz, Yauzcuz couxbawx daengj doengh-gij minzcuz fungcingz byaujyienj neix, daj gak fuengmienh lai gakdoh daeuj baijyienj gij minzcuz fungcingz Hocouh Si, gaisau dieggingj gyaendei swngghadai nungzyez fazcanj mozi Hocouh Si hawj daengx guk yinzminz.

(Ho Couh)



▲ Cunghyangh Densidaiz gijcej youq Hocouh caijfangj dieggingj gyaendei caeuq minzcuz fungcingz.

Dunghlanz Gawjbanh “Hoh Dangj Cibbet Daih Doeg Saw Hwng Cunghvaz” Hozdung

东兰举办“庆党十八 读书兴中华”活动

12 nyied 24 hauh, Dunghlanz Yen Duzsuhgvani youq yienh vwnzva cunghsim gvangcangz gawjbanh “Hoh Dangj Cibbet Daih Doeg Saw Hwng Cunghvaz” hozdung, doenggvaq canjlanj gij suhfaz, veh vehfunghgingj haenx, haucau ginzung lai doeg saw, doeg saw ndei, fungfouq vwnzva swngghoz. Youq gwnz hoih hozdung, gyoengq bounx veiyen Dunghlanz Suhva Hezvei haenx youq yienhciegz sij suhfaz, veh veh mienxngaenz soengq hawj vunzlai, senhconz Cibbet Daih cingsaenz. Ginzung cungj haenh naeuz gawjbanh baez hozdung neix eiqsei naekhung, ndaej daengz vunzlai haenh ndei.

(Veiz Lantz)



◀ Dunghlanz Suhva Hezvei veiyen youq yienhciegz sij suhfaz, veh veh, mienxngaenz soengq hawj vunzlai.

Denzlinz: Nungzminz Nyaengq Gvej Haz Gvak Reih Bwh Ndaem Gocazyouz

田林：积极砍草备种油茶

Denzlinz Yen aeu cazyouz canjyez dangguh aen daegbied youhsi canjyez coicaenh nungzyez demsou ndeu, caemh aeu cazyouz canjyez dangguh aen canjyez donghsaeu sawj aen yienh bienq akhung sawj lwgminz ndaej fouqmiz ndeu. Aenvih gveihva ndaej hableix, cauhamoq gisuz, roengzngaenz daengz dieg, ndaej daengz ginzung haenh ndei. 2012 nienz, aen yienh neix ndaem gocazyouz miz 25.21 fanh moux, ndaej saedyienh le aen muzbyauh cazyouz canjiz 1.5 ik maenz.

(Denz Linz)